


Iso Camartin retschaiva il premi SRG.R

■ (rtr) Iso Camartin vegn undrà cun il premi 2014 da la SRG.R, la societad purtadra da RTR Radiotelevision Svizra Rumantscha. Quai ha la suprastanza, presidiada dad Oscar Knapp, decidì. Iso Camartin vegn onurà per sia lavur cumplexsiva en favur da lingua, cultura e societad rumantscha. En sias lavurs ed incumbensas ha *Iso Camartin* sco autur e publicist, magister e professor, oratur e referent, secretari ed expert, schurnalist e cronist, ambassadur ed intermediatur, perscrutader e scienzià adina accentuà sia provegnientscha rumantscha, ha scrit per rumantsch e sur dal rumantsch e fatg enconuscent questa cultura en tut il mund. Questa lavur cumplexsiva vul la SRG.R renconuscher. La surdada dal premi ha lieu ils 14 da zercladur 2014 a Trun, e quai en il rom da la radunanza generala da la SRG.R.

Studis e piazzas

Iso Camartin è naschì ils 23 da mars 1944. Ensemen cun ses frar Simon è el creschì si a Mustér, frequentà là las scolas dal vitg ed il gimnasi da la scola claustrala. A partir da 1965 ha el studegià filosofia e romanistica a Minca, Bologna e Regensburg. 1971 ha acquistà Iso Camartin il doctorat cun ina lavur sur da Fichte e Kant a l'Universitad da Regensburg. I suondan lavurs scientificas a Lyon, Regensburg ed a la Harvard University a Cambridge en ils Stadis Unids da l'America. 1978 è el vegl elegl – sco successur da Hendri Spescha – secretari da la Lia Rumantscha, in post ch'el ha bandunà



legenda

1980. Da 1985 fin 1997 è stà Camartin professor ordinari per litteratura rumantscha e cultura al Politecnicum federal ed a l'Universitad da Turitg.

Tar la Televisiun Svizra

Da 1996 fin 1998 ha moderà Iso Camartin l'emissiun «Sternstunde Kunst» da SF DRS. Il matg 2000 ha clamà il directur da la Televisiun Svizra (SF), *Peter Schellen-*

berg, Iso Camartin sco manader da la nova partiziun «cultura» a Turitg. Quel post ha el bandunà la fin 2003 e lavura dapi lura vinavant sco publicist e referent.

Uffizis

Iso Camartin ha fatg e fa part da divers gremis. Il pli impurtants: cumissiun federala per la matura, president da la retscha d'ediziun CH, commember dal cussegl da

fundaziun da la Pro Helvetia, commember da las giurias per il premi Büchner, premi Ingeborg Bachmann, prix J. J. Rousseau, commember da l'Uniu da scripturas e scripturs svizzers, vicepresidente da la fundaziun Landis e Gyr Zug, commember da la fundaziun Hans Ringier, commember dal cussegl scientific New Europe College Bucarest, commember dal club da schurnalists PEN.

Retschertga, essais e belletristica, critica

Duas ovras sajan numnadas qua, perquai ch'ellas s'audan oz tar il canon cura ch'i va per litteratura rumantscha e per linguatgs minurs en l'Europa: Rätoromansche Gegenwartsliteratur. Mustér, Casa editura Desertina, 1976, e Nichts als Worte? Ein Pladoyer fur Kleinsprachen, Artemis, 1985.

Distincziuns

Tgi fa curvien che Iso Camartin è adina puspè vegnì onurà per sia lavur e per sias prestaziuns! Uschia cun il Premi Oertli (1984), Premi europeic Charles Veillon (1986) e quel da C. F. Meyer (1988). L'onn 2005 ha il chantun Grischun undrà Iso Camartin cun il premi da cultura.

Ed uss vegn quel da la SRG.R! In premi che duai era suttastritgar las bunas relaziuns da l'undrà e giubilar che festivescha il 2014 ses 70avel onn da naschienscha, cun RTR Radiotelevision Svizra Rumantscha. Dapi blers onns è el collavuratur dals programs da RTR, dal 2005 fin il 2013 p. ex. sco autur da l'emissiun «Forum» dal Radio Rumantsch, nua ch'el ha intermedià a moda maisterila ovras da la filosofia e da la musica. La SRG.R undrescha Iso Camartin per sia lavur excellenta ed extraordinaria sco autur, publicist ed intermediatur da la litteratura e cultura rumantscha e per ses engaschi per il rumantsch en Svizra, en l'Europa ed en il mund insumma.